

Comisario Ronny Bernadina a duna un conferencia di prensa pa yuda mantene e nomber safe cu Aruba tin

ORANJESTAD (AAN): Ayera mainta comisario Ronny Bernadina a tene un rueda di prensa pa prensa local y internacional, pa reacciona riba e echo cu Aruba ta saliendo na un forma negativo riba canalnan Mericano.

Tambe Trudy Hassel a duna

un splicacion riba e accion cu lo bay tuma lugar den oranan di atardi, unda cu trahadornan di Gobierno a haya e atardi liber pa yuda busca Natalee, unda cu un buskeda coordina a worde organisa.

Comisario Bernadina a cuminsa na bisa cu e muchanan Mericano cu a bin



Aruba pa celebra, a worde trata manera adulto, pues na Aruba cu edad di 18 aña bo

mag di consumi alcohol, contrario di na Merca, unda cu e edad ta 21 aña.

Segun Bernadina na e momentonan ey, e no por a duna informacion riba e investigacion, pa motibo cu na e momentonan cu e rueda di prensa tabata tuma lugar, no tabata tin informacion nobo pa loke ta e caso di Natalee Holloway.

Segun Bernadina, Aruba semper tabata conoci pa ta un isla hopi sigur, sinembargo e noticianan cu ta saliendo afo via prensa internacional, ta dunando e impresion cu Aruba no ta un lugar safe, sinembargo Bernadina a enfatisa cu Aruba te ainda ta un lugar hopi sigur.

E comisario a splica cu Cuerpo Policial a haya algun tempo pasa ayudo di "Visibility Team", cu a worde funda pa Aruba Hospitality & Security Foundation

(AH&SF) pa asina haci cos ainda mas safe na Aruba.

Bernadina a duna ehempel pa mustra cu Aruba ta hopi safe, unda cu el a menciona cu e ta wak hopi turista ta cana nan so na hopi caminda na Aruba y cu esaki ta algo cu hopi caminda rond mundo bo no por haci, como turista riba un lugar desconoci pabo.

Segun e comisario si bo puntra cualkier turista cu ta custumbra di bin Aruba, nan lo bisa mescos.

Rob Smith, kende ta Presidente di AH&SF a splica cu e fundacion ta opera cu un budget di 1 miyon dolar pa enfoca riba seguridad di e bishitantenan di Aruba.

Segun Smith e fundacion ta dunando tur sosten y colaboracion posibel pa cu e buskeda di Natalee.

El a bisa tambe cu e fundacion ta existi 4 aña caba y cu no a lanta e fundacion aki pa motibo di necesidad.

Aruba semper tabata safe y e fundacion a lanta, pa mantene esaki asina.

Smith a sigui bisa cu investigacion no ta solamente pa haya pista, sino tambe pa elimina cierto posibilidadnan.